

76.006

069274



脉經卷第九

朝散大夫守光祿卿直祕閣判登聞檢院上護軍臣林億等類次

平妊娠分別男女將產諸證第一

平妊娠胎動血分水分吐下腹痛證第二

平產後諸病鬱冒中風發熱煩嘔下利證第三

平帶下絕產無子亡血居經證第四

平鬱冒五崩漏下經閉不利腹中諸病證第五

平咽中如有灸腐喜悲熱入血室腹滿證第六

平陰中寒轉胞陰吹陰生瘡脫下證第七

平婦人病生死證第八

平小兒雜病證第九

平妊娠分別男女將產諸證第一

脉平而虛者乳子法也經云陰搏陽別謂之有子此是血氣和調陽施陰化也診其手少陰脉動甚者妊子也少陰心脉也心主血脉又腎名胞門子戶尺中腎脉也尺中之脉按之不絕法妊娠也三部脉沈浮正等按之無絕者有娠也妊娠初時寸微小呼吸五至三月而尺數也脉滑疾重以手按之散者胎已三月也脉重手按之不散但疾不滑者五月也婦人妊娠四月欲知男女法左疾爲男右疾爲女俱疾爲生二子

又法得太陰脉爲男得太陽脉爲女太陰脉沈太陽脉浮

又法左手沈實爲男右手浮大爲女左右手俱沈實

猥生二男左右手俱浮大猥生二女

又法尺脉左偏大爲男右偏大爲女左右俱大產二子大者如實狀

又法左右尺俱浮爲產二男不爾則女作男生左右尺俱沈爲產二女不爾則男作女生也

又法遣姪娠人面南行還復呼之左迴首者是男右迴首者是女也

又法看上圍時夫從後急呼之左迴首是男右迴首是女也

又法婦人姪娠其夫左乳房有核是男右乳房有核是女也

婦人懷娠離經其脉浮設腹痛引腰脊爲今欲生也

但離經者不病也

又法婦人欲生其脉離經夜半覺日中則生也

平妊娠胎動血分吐下腹痛證第二

婦人懷胎一月之時足厥陰脉養二月足少陽脉養  
三月手心主脉養四月手少陽脉養五月足太陰脉  
養六月足陽明脉養七月手太陰脉養八月手陽明  
脉養九月足少陰脉養十月足太陽脉養諸陰陽各  
養三十日活兒手太陽少陰不養者下主月水上爲  
乳汁活兒養母懷娠者不可灸刺其經必墮胎  
婦人懷娠三月而渴其脉反遲者欲爲水分復腹痛  
者必墮胎

脉浮汗出者必閉其脉數者必發離濃五月六月脉

數者必向壞脉緊者必胞漏脉遲者必腹滿而喘脉  
浮者必水壞爲腫

問曰有一婦人年二十所其脉浮數發熱嘔欬時下  
利不欲食脉復浮經水絕何也師曰法當有娠何以  
故此虛家法當微弱而反浮數此爲戴陽陰陽和合  
法當有娠到立秋熱當自去何以知然數則爲熱熱  
者是火火是木之子死於未未爲六月位土王火休  
廢陰氣生秋節氣至火氣當罷熱自除去其病即愈  
師曰乳後三月有所見後三月來脉無所見此便是  
軀有兒者護之恐病利也何以故懷妊陽氣內養乳  
中虛冷故令兒利

婦人懷娠六月七月脉弦發熱其胎踰腹腹痛惡寒

寒者小腹如扇之狀所以然者子藏開故也當以附子湯溫其藏

婦人妊娠七月脈實大牢強者生沈細者死

婦人妊娠八月脈實大牢強弦緊者生沈細者死

婦人懷軀六月七月暴下斗餘水其胎必倚而墮此非時孤漿預下故也

師曰寸口脈洪而濇洪則爲氣濇則爲血氣動丹田其形即溫濇在於下胎冷若冰陽氣胎活陰氣必終欲別陰陽其下必殭假令陽終畜然若杯

問曰婦人妊娠病師脈之何以知此婦人雙胎其一獨死其一獨生而爲下其死者其病即愈然後音免

軀其脈何類何以別之

師曰寸口脉衛氣平調榮氣緩舒陽施陰化精盛有  
餘陰陽俱盛故成雙軀今少陰微緊血即濁凝經養  
不周胎則偏夭少腹冷滿膝臏疼痛腰重起難此爲  
血理若不早去害母失胎

師曰婦人有胎腹痛其人不安若胎病不長欲知生  
死令人摸之如覆杯者則男如肘頭參差起者女也  
冷在何面冷者爲死溫者爲生

師曰婦人有漏下者有中後因續下血都不絕者  
有妊娠下血者假令妊娠腹中痛爲胞漏

阻云

膠艾湯

主之

婦人妊娠經斷三月而得漏下下血四十日不止胎  
欲動在於臍上此爲妊娠六月動者前三月經水利



時胎也下血者後斷三月衄也所以下血不止者其  
癆不去故也當下其癆宜桂枝茯苓圓

問曰婦人病經水斷一二月而反經來今脉反微澀  
何也師曰此前月中若當下利故令妨經利止月經  
當自下此非軀也

婦人經自斷而有軀其脉反弦恐其後必大下不成  
軀也

婦人懷軀七月而不可知時時衄血而轉筋者此爲  
軀也衄時嚏而動者非軀也

脉來近去遠故曰反以爲有軀而反斷此爲有陽無  
陰故也

婦人經月下但爲微少師脉之反言有軀其後審然

其脉何類何以別之師曰寸口脉陰陽俱平榮衛調和按之滑浮之則輕陽明少陰各如經法身反洒淅不欲食飲頭痛心亂嘔噦欲吐呼則微數吸則不驚陽多氣溢陰滑氣盛滑則多實六經養成所以月見陰見陽精汁凝胞散散者損墮設復陽盛雙姪二胎今陽不足故令激經也

婦人姪娠小便難飲如故當歸貝母苦參圓主之

婦人姪娠有水氣身重小便不利洒洒惡寒起即頭眩葵子茯苓散主之

婦人姪娠宜服當歸散即易產無疾苦

師曰有一婦人來診脉一作自道經斷不來師言一月爲

一二月爲血三月爲居經是定作軀也或爲血積譬

如雞乳子熱者爲祿寒者多濁且當須後月復來經  
當入月幾日來假令以七日所來因言且須後月十  
日所來相間設其主復來者因脉之脉反沈而澹因  
問曾經半生若漏下亡血者定爲有軀其人言實有  
是宜當護之今經微弱恐復不安設言當奈何當爲  
合藥治之

師曰有一婦人來診自道經斷即去師曰一月血爲  
閉二月若有若無三月爲血積譬如雞伏子中寒即  
濁中熱即祿欲令胎壽當治其母挾寒懷子命則不  
壽也譬言如雞伏子試取雞一毛拔去覆子不遍中寒  
者濁今夫人有軀少腹寒手掌反逆奈何得有軀婦  
人因言當奈何師曰當與溫經湯設與夫家俱來者

有軀與父母家俱來者當言寒多久不作軀

師曰有一婦人來診因言陰陽俱和調陽氣長陰氣

短但出不入去近來遠故曰反以為有軀偏反血斷

斷來幾日假令審實者因言急當治恐經復下設令

宮中人若寡婦無夫曾夜夢寐交通邪氣或懷久作

癆瘵急當治下服二湯設復不愈因言髮湯當中下

胎而反不下此何等意邪可使且將視赤烏一作赤馬

師曰若宮里張氏不差復來相問臣億等詳此文理脫誤不屬無本可

校以示闕疑餘皆倣此

師曰脉婦人得平脉陰脉小弱其人渴不能食無寒

熱名為軀桂枝主之法六十日當有娠設有醫治逆

者却一月加吐下者則絕之方在傷寒中

婦人脉平而虛者乳子法也平而微者實奄續法也而反微瀆其人不可亡血下利而反甚其脉虛但坐乳大兒及乳小兒此自其常不能令甚虛竭病與亡血虛等必眩冒而短氣也

師曰有一婦人好裝衣來診而得脉瀆因問曾乳子下利乃當得此脉耳曾半生漏下者可設不者經斷三月六月設乳子漏下可爲奄續斷小兒勿乳須利止復來相問脉之

師曰寸口脉微遲尺微於寸寸遲爲寒在上臆但當吐耳今尺反虛復爲強下之如此發背滿而痛者必吐血少腹痛腰脊痛者必下血師曰寸口脉微而弱氣血俱虛若下血嘔吐汗出者可不者跌陽脉微而

弱春以胃氣爲本吐利者可不者此爲水氣其腹必  
滿小便則難

婦人常嘔吐而胃反若常喘一作多唾其經又斷設來者

必少

師曰有一婦人年六十所經水常自下設久得病利  
少腹堅滿者爲難治

師曰有一婦人來診言經水少不如前者何也師曰  
曾更下利若汗出小便利者可何以故師曰亡其津  
液故令經水少設經下反多於前者當所苦困當言  
恐大便難身無復汗也

師曰寸口脉沈而遲沈則爲水遲則爲寒寒水相搏  
跌陽脉伏水穀不化脾氣衰則鶩溇胃氣衰則身體

腫少陽脉卑少陰脉細男子則小便不利婦人則經水不通經爲血血不利則爲水名曰血分一作水分

師曰寸口脉沈而數數則爲出沈則爲入出則爲陽實入則爲陰結趺陽脉微而弦微則無胃氣弦則不得息少陰脉沈而滑沈則爲在裏滑則爲實沈滑相搏血結胞門其藏不瀉經絡不通名曰血分

問曰病有血分何謂也師曰經水前斷後病水名曰血分此病爲難治

問曰病有水分何謂也師曰先病水後經水斷名曰水分此病易治何以故去水其經自當下

脉濡而弱弱反在關濡反在顛遲在上緊在下遲則爲寒名曰渾陽濁則濕名曰霧務緊則陰氣慄脉反濡

弱濡則中濕弱則中寒寒濕相搏名曰痺腰脊骨節  
苦煩肌爲不仁此當爲痺而反懷軀遲歸經體重以  
下脚爲肘腫按之沒指腰冷不仁此爲水懷喘則倚  
息小便不通緊脉爲嘔血氣無餘此爲水分榮衛乖  
亡此爲非軀

平產後諸病鬱冒中風發熱煩嘔下利證第三  
問曰新產婦人有三病一者病瘧瘧亦作瘧二者病鬱冒

三者大便難何謂也師曰新產亡血虛多汗出喜中  
風故令病瘧何故鬱冒師曰亡血復汗寒多故令鬱  
冒何故大便難師曰亡津液胃燥故大便難產婦鬱  
冒其脉微弱嘔不能食大便反堅但頭汗出所以然  
者血虛而厥厥而必冒冒家欲解必大汗出以血虛



下厥孤陽上出故但頭汗出所以生婦喜汗出者亡  
陰血虛陽氣獨盛故當汗出陰陽乃復所以便堅者  
嘔不能食也小柴胡湯主之病解能食七八日而更  
發熱者此爲胃熱氣實承氣湯主之方在傷寒中  
婦人產得風續之數十日不解頭微痛惡寒時時有  
熱心下堅乾嘔汗出雖久陽旦證續在可與陽旦方  
在傷寒中桂枝是也

婦人產後中風發熱面正赤喘而頭痛竹葉湯主之  
婦人產後腹中疝痛可與當歸羊肉湯

師曰產婦腹痛煩滿不得卧法當枳實芍藥散主之  
假令不愈者此爲腹中有乾血著臍下與下瘀血湯  
婦人產後七八日無太陽證少腹堅痛此惡露不盡

不大便四五日跌陽脉微實再倍其人發熱日晡所  
煩躁者不能食譫語利之則愈宜承氣湯以熱在裏  
結在膀胱也方在傷寒中

婦人產中虛煩亂嘔逆安中益氣竹皮大圓主之  
婦人熱利重下新產虛極白頭翁加甘草湯主之  
金

方又加  
阿膠

### 平帶下絕產無子亡血居經證第四

師曰婦人帶下六極之病脉浮則為腸鳴腹滿緊則  
為腹中痛數則為陰中癢痛則生瘡弦則陰疼掣痛  
師曰帶下有三門一曰胞門二曰龍門三曰玉門已  
產屬胞門未產屬龍門未嫁女屬玉門

問曰未出門女有三病何謂也師曰一病者經水初

下陰中熱或有當風或有扇者二病者或有以寒水洗之三病者或見丹下驚怖得病屬帶下

師曰婦人帶下九實中事假令得鼠乳之病劇易當劇有期當庚辛爲期餘皆倣此

問曰有一婦人年五十所病但苦背痛時時腹中痛少食多厭喜臏脹其脉陽微關尺小緊形脉不相應願知所說師曰當問病者飲食何如假令病者言我不欲飲食聞穀氣臭者病爲在上臏假令病者言我少多爲欲食不食亦可病爲在中臏假令病者言我自飲食如故病爲在下臏爲病屬帶下當以帶下治之婦人帶下經水不利少腹滿痛經一月再見土瓜根散主之

婦人帶下脉浮惡寒漏下者不治

師曰有一婦人將一女子年十五所來診言女年十四時經水自下今經反斷其母言恐怖師曰言此女爲是夫人親女非耶若親者當相爲說之婦人因荅言自是女爾師曰所以問者無他夫人年十四時亦以經水下所以斷此爲避年勿怪後當自下

婦人少腹冷惡寒久年少者得之此爲無子年大者得之絕產

師曰脉微弱而澀年少得此爲無子中年得此爲絕產師曰少陰脉浮而緊緊則疝瘕腹中痛半產而墮傷浮則亡血絕產惡寒

師曰肥人脉細胞有寒故令少子其色黃者胃上有寒

婦人少腹硯

音磊切

罪

轉痛而復自解發作無常經

反斷膀胱中結堅急痛下引陰中氣衝者久必兩脇拘急

問曰婦人年五十所病下利數十日不止暮則發熱少腹裏急痛腹滿手掌熱脣口乾燥何也師曰此病屬帶下何以故曾經半產瘀血在少腹中不去何以知之其證脣口乾燥故知之當與溫經湯

問曰婦人病下利而經水反斷者何也師曰但當止利經自當下勿恠所以利不止而血斷者但下利亡津液故經斷利止津液復經當自下

婦人血下咽乾而不渴其經必斷此榮不足本自有微寒故不引飲渴而引飲者津液得通榮衛自和其

經必復下

師曰寸口脉微而濇微則衛氣不足濇則血氣無餘  
衛不足其息短其形燥血不足其形逆榮衛俱虛言  
語謬誤跌陽脉浮而濇濇則胃氣虛虛則短氣咽燥  
而口苦胃氣濇則失液少陰脉微而遲微則無精遲  
則陰中寒濇則血不來此爲居經三月一來

師曰脉微血氣俱虛年少者亡血也乳子下利爲可  
不者此爲居經三月一來

問曰婦人妊娠三月師脉之言此婦人非軀今月經  
當下其脉何類何以別之師曰寸口脉衛浮而大榮  
反而弱浮大則氣強反弱則少血孤陽獨呼陰不能  
吸二氣不停衛降榮竭陰爲積寒陽爲聚熱陽盛不

潤經絡不足陰虛陽往一作實故令少血時發洒淅咽燥  
汗出或溲稠數多唾涎沫此令重虛津液漏泄故知  
非軀畜煩滿洩月稟一經三月一來陰盛則瀉名曰  
居經

問曰婦人年五十所一朝而清血二三日不止何以  
治之師曰此婦人前絕生經水不下今反清血此爲  
居經不須治當自止經水下常五日止者五日愈  
婦人月經一月再來者經來其脉欲自如常而反微  
不利不汗出者其經二月必來

平鬱冒五崩漏下經閉不利腹中諸病證第五  
問曰婦人病經水適下而發其汗則鬱冒不知人何  
也師曰經水下故爲裏虛而發其汗爲表復虛此爲

表裏俱虛故令鬱冒也

問曰婦人病如癩疾鬱冒一日二十餘發師脉之反  
言帶下皆如師言其脉何類何以別之師曰寸口脉  
濡而緊濡則陽氣微緊則榮中寒陽微衛氣虛血竭  
凝寒陰陽不和邪氣舍於榮衛疾疾一作候起年少時經  
水來以合房室移時過度精感命門開經下血虛百  
脉皆張中極感陽動微風激成寒因虛舍榮衛冷積  
於丹田發動上衝奔在胃隔津液掩口入涎唾涌溢  
出眩冒狀如厥氣衝髀裏熱粗醫名爲癩灸之因大劇  
問曰婦人病苦氣上衝皆眩冒吐涎沫髀裏氣衝熱  
師脉之不名帶下其脉何類何以別之師曰寸口脉  
沈而微沈則衛氣伏微則榮氣絕陽伏則爲疹陰絕



則亡血病當小便不利津液閉塞今反小便通微汗  
出沈變爲寒欬逆嘔沫其肺成痿津液竭少亡血損  
經絡因寒爲血厥手足苦痺氣從丹田起上至脊脇  
沈寒怫鬱於上脊中空塞氣歷陽部面翕如醉形體  
似肥此乃浮虛醫反下之長針復重虛榮衛久發眩  
冒故知爲血厥也

問曰五崩何等類師曰白崩者形如涕赤崩者形如  
絳津黃崩者形如爛瓜青崩者形如藍色黑崩者形  
如衄血也

師曰有一婦人來脉反得微瀼法當吐若下利而言  
不因言夫人年幾何夫人年七七四十九經水當斷  
反至今不止以故致此虛也

寸口脉弦而大弦則為減大則為芤減則為寒芤則為虛寒虛相搏脉則為革婦人則半產漏下旋復花湯主之

婦人陷經漏下黑不解膠薑湯主之

婦人經水不利抵當湯主之在傷寒中

婦人經水閉不利藏堅僻不止中有乾血下白物礬石圓主之

石圓主之

婦人腹中諸疾痛當歸芍藥散主之

一云治懷妊腹中疼痛

婦人腹中痛小建中湯主之方在傷寒中

一云腹中痛小便利理中湯主之

平咽中如有炙腐喜悲熱入血室腹滿證第六

婦人咽中如有炙腐狀半夏厚朴湯主之

婦人藏燥喜悲傷欲哭象如神靈所作數欠甘草小

麥湯主之

婦人中風發熱惡寒經水適來得之七八日熱除脉  
遲身涼背脇下滿如結背狀其人譫語此為熱入血  
室當刺期門隨其虛實而取之

婦人中風七八日續有寒熱發作有時經水適斷者  
此為熱入血室其血必結故使如瘧狀發作有時小  
柴胡湯主之方在傷寒中

婦人傷寒發熱經水適來晝日了了暮則譫語如見  
鬼狀此為熱入血室無犯胃氣若上二焦必當自愈疑

陽明病下血而譫語此為熱入血室但頭汗出者當  
刺期門隨其實而寫之澱然汗出者則愈

婦人少腹滿如乾乾狀要略云小便微難而不渴生

後疑生後者此為水與血并結在血室大黃甘遂湯主之

平陰中寒轉胞陰吹陰生瘡脫下證第七

婦人陰寒溫中坐藥蛇床子散主之

婦人著坐藥強下其經目眦為痛足跟難以踐地心中狀如懸

問曰有一婦人病飲食如故煩熱不得卧而反倚息者何也師曰得病轉胞不得溺也何以故師曰此人故肌盛頭舉身滿今反羸瘦頭舉中空感一作減胞系了戾故致此病但利小便則愈宜服腎氣圓以中有茯苓故也方在虛勞中

師曰脉得浮緊法當身軀疼痛設不痛者當射云何因當射言若腸中痛腹中鳴欬者因失便婦人得此

脉者法當陰吹

師曰寸口脉浮而弱浮則爲虛弱則無血浮則短氣弱則有熱而自汗出跌陽脉浮而濇浮則氣滿濇則有寒喜噫吞酸其氣而下少腹則寒少陰脉弱而微微則少血弱則生風微弱相搏陰中惡寒胃氣下泄吹而正喧

師曰胃氣下泄吹而正喧此穀氣之實也膏髮導寸之少陰脉滑而數者陰中則生瘡

少陰脉數則氣淋陰中生瘡

婦人陰中蝕瘡爛狼牙湯洗之

婦人藏腫如瓜陰中疼引脊痛者杏仁湯主之

少陰脉弦者白腸必挺核

少陰脈浮而動浮則爲虛動則爲痛婦人則脫下

平婦人病生死證第八

診婦人漏血下赤白日下血數升脈急疾者死遲者生  
診婦人漏下赤白不止脈小虛滑者生大緊實數者死  
診婦人新生乳子脈沈小滑者生實大堅弦急者死  
診婦人疝瘕積聚脈弦急者生虛弱小者死

診婦人新生乳子因得熱病其脈懸小四肢溫者生  
寒清者死

診婦人生產因中風傷寒熱病喘鳴而肩息脈實大  
浮緩者生小急者死

診婦人生產之後寸口脈焮疾不調者死沈微附骨  
不絕者生

金瘡在陰處出血不絕陰脉不能至陽者死接陽而復出者生

平小兒雜病證第九

小兒脉呼吸八至者平九至者傷十至者困

診小兒脉法多雀鬪要以三部脉爲主若緊爲風癩沈者乳不消弦急者客忤氣

小兒是其日數應變蒸之時身熱而脉亂汗不出不欲食食輒吐喎者脉亂無苦也

小兒脉沈而數者骨間有熱欲以腹按冷清也


小兒大便赤青瓣殮洩脉小手足寒難已脉小手足温易已

小兒病困汗出如珠著身不流者死

小兒病其頭毛皆上逆者必死耳間青脉起者痲痛  
小兒病而凶陷入其口脣乾目皮反口中氣出冷足  
與頭相抵卧不舉身手足四肢垂其卧正直如得縛  
其掌中冷皆死至十日不可復治之

脉經卷第九





脉經卷第十 手檢圖三十一部

朝散大夫守光祿卿直祕閣判登聞檢院上護軍臣林億等類次

經言肺者人之五藏華蓋也上以應天解理萬物主  
行精氣法五行四時知五味寸口之中陰陽交會中  
有五部前後左右各有所主上下中央分爲九道浮  
沈結散知邪所在其道柰何歧伯曰脉大而弱者氣  
實血虛也脉大而長者病在下候浮直上下交通者  
陽脉也堅在腎急在肝實在肺前如外者足太陽也  
中央如外者足陽明也後如外者足少陽也中央直  
前者手少陰也中央直中者手心主也中央直後者  
手太陰也前如內者足厥陰也中央如內者足太陰  
也後如內者足少陰也前部左右彈者陽蹻也中部

左右彈者帶脉也後部左右彈者陰蹻也從少陽之厥陰者陰維也從少陰之太陽者陽維也來大時小者陰絡也來小時大者陽絡也

前如外者足太陽也動苦頭項腰痛浮爲風濇爲寒熱緊爲宿食

前如外者足太陽也動苦目眩頭頸項腰背強痛也男子陰下濕女子月水不利少腹痛引命門陰中痛子藏閉浮爲風濇爲寒血滑爲勞熱緊爲宿食鍼入九分却至六分

中央如外者足陽明也動苦頭痛面赤微滑苦大便不利腸鳴不能食足脛痺

中央如外者足陽明也動苦頭痛面赤熱浮微滑苦

大便不利喜氣滿滑者爲飲瀆爲嗜卧腸鳴不能食  
足胗痺鍼入九分却至六分

後如外者足少陽也動苦腰背胗股肢節痛

後如外者足少陽也浮爲氣漚漚爲風血急爲轉筋  
絃爲勞鍼入九分却至六分

右足三陽脉

前如內者足厥陰也動苦少腹痛月經不利子藏閉  
前如內者足厥陰也動苦少腹痛與腰相連大便不  
利小便難莖中痛女子月水不利陰中寒子門壅絕  
內少腹急男子疝氣兩丸上入淋也鍼入六分却至  
三分

中央如內者足太陰也動苦胃中痛食不下欬唾有

血足脛寒少氣身重從腰上狀如居水中

中央如內者足太陰也動苦腹滿上管有寒食不下  
病以飲食得之沈澹者苦身重四肢不動食不化煩  
滿不能卧足脛痛苦寒時欬血泄利黃鍼入六分却  
至三分

後如內者足少陰也動苦少腹痛與心相引背痛淋  
從高墮下傷於內小便血

後如內者足少陰也動苦小腹痛與心相引背痛淋  
從高墮下傷於尻內便血裏急月水來上搶心脊脅  
滿拘急股裏急也鍼入六分却至三分

右足三陰脉

前部左右彈者陽蹻也動苦腰背痛微澹為風癩取

陽蹻

前部左右彈者陽蹻也動苦腰痛癩癩惡風偏枯僵  
仆羊鳴瘧痺皮膚身體強淫一作痺直取陽蹻在外踝  
上三寸直絕骨是

中部左右彈者帶脉也動苦少腹痛引命門女子月  
水不來絕繼復下止陰辟寒令人無子男子苦少腹  
拘急或失精也

後部左右彈者陰蹻也動苦癩癩寒熱皮膚強淫一作痺  
後部左右彈者陰蹻也動苦少腹痛裏急腰及髀窵  
下相連陰中痛男子陰疝女子漏下不止

右陽蹻陰蹻帶脉

中央直前者手少陰也動苦心痛微堅腹脇急實堅

者爲感忤純虛者爲下利腸鳴滑者爲有娠女子陰  
中癢痛痛出玉門上一分前

中央直中者手心主也動苦心痛面赤食苦咽多喜  
怒微浮者苦悲傷恍惚不樂也潛爲心下寒沈爲恐  
怖如人捕之狀也時寒熱有血氣

中央直後者手太陰也動苦欬逆氣不得息浮爲內  
風緊潛者脊中有積熱時欬血也有沈熱

右手三陰脉

從少陰斜至太陽是陽維也動苦肌肉痺癢

從少陰斜至太陽是陽維也動苦顛僵仆年鳴手足  
相引甚者夫者不能言癩疾直取客主人兩陽維脉  
在外踝絕骨下二寸

從少陽斜至厥陰是陰維也動苦癩癩僵仆羊鳴  
從少陽斜至厥陰是陰維也動苦僵仆失音肌肉淫  
癢痺汗出惡風

脉來暫大暫小是陰絡也一作結動苦肉痺應時自發身  
洗洗也

脉來暫小暫大者是陽絡也一作結動苦皮膚痛下部不  
仁汗出而寒也

肺脉之來也如循榆葉曰平如風吹毛曰病狀如連  
珠者死期丙丁日禺中日中

心脉之來也如反筍莞大曰平如連珠曰病前曲後  
居如帶鉤者死期壬癸日人定夜半

肝脉之來也搏而弱曰平如張新弓絃曰病如雞踐



地者死期庚辛日晡時日入

脾脉之來也阿阿如緩曰平來如雞舉足曰病如鳥  
之啄如水之漏者死期甲乙日平日日出

腎脉之來也微細以長曰平來如彈石曰病去如解  
索者死期戊己日食時日昃黃昏雞鳴

寸口中脉躁音尺關中無脉應陽干陰也動苦腰背  
腹痛陰中若傷足寒刺足太陽少陰直絕骨入九分  
灸大陰五壯

尺中脉堅實音尺寸口無脉應陰干陽也動苦兩脛  
腰重少腹痛癩疾刺足太陰踝上三寸鍼入五分又  
灸太陽陽蹻在足外踝上三寸直絕骨是也

寸口脉緊直至魚際下小按之如持維子雞一作狀其

病腸鳴足痺痛酸腹滿不能食得之寒濕刺陽維在外踝上三寸間也入五分此脉出魚原一作際

寸口脉沈著骨反仰其手乃得之此腎脉也動苦少腹痛腰體酸癩疾刺腎俞入七分又刺陰維入五分初持寸口中脉如細堅狀久按之大而深動苦心下有寒背脅苦痛陰中痛不欲近丈夫也此陰逆刺期門入六分又刺腎俞入五分可灸胃管七壯

初持寸口中脉如躁狀洪大久按之細而牢堅動苦腰腹相引痛以下至足脘重也不能食刺腎俞入四分至五分亦可灸胃管七壯

尺寸俱沈但有關上脉苦寒心下痛

尺寸俱沈關上無有者苦心下喘

尺寸俱數有熱俱遲有寒

尺寸俱微厥血氣不足其人少氣

尺寸俱濡弱發熱惡寒汗出一云內溫熱手

寸口沈肅中痛引背一云短氣

關上沈心痛上吞酸

尺中沈引背痛

寸口伏肅中有逆氣

關上伏有水氣泄瀉

尺中伏水穀不消

寸口絃胃中拘急一作心下幅幅

關上絃胃中有寒心下拘急

尺中絃少腹臍下拘急

寸口緊頭痛逆氣

關上緊心下痛

尺中緊臍下少腹痛

寸口濇無陽少氣

關上濇無血厥冷

尺中濇無陰厥冷

寸口微無陽外寒

關上微中實

一作能食故裏急  
胃虛

尺中微無陰厥冷腹中拘急

寸口滑骨滿逆

關上滑中實逆

尺中滑下利少氣

寸口數即吐

關上數胃中有熱

尺中數惡寒小便赤黃

寸口實即生熱虛即生寒

關上實即痛虛即脹滿

尺中實即小便難少腹牢痛虛即閉澀

寸口芤吐血微芤衄血

關上芤胃中虛

尺中芤下血微芤小便血

寸口浮其人中風發熱頭痛

關上浮腹痛心下滿

尺中浮小便難

寸口遲上焦有寒

關上遲弱無胃氣有熱

尺中遲下焦有寒背痛

寸口濡陽弱自汗出

關上濡下重

尺中濡少血發熱惡寒

寸弱陽氣少

少關 元關

尺弱少血

脉經卷第十

熙寧元年七月十六日

進呈奉

聖旨鏤版施行

朝奉郎守國子博士同校正醫書上騎都尉賜緋魚袋臣高保衡  
朝奉郎守尚書屯田郎中同校正醫書騎都尉賜緋魚袋臣孫奇  
朝散大夫守光祿卿直祕閣判登聞檢院上護軍臣林億

熙寧二年七月十四日

朝散大夫右諫議大夫參知政事護軍長安郡開國侯食邑五百戶賜紫金魚袋臣王安石  
推恩佐理皇極大行右諫議大夫參知政事在國南陽郡開國侯食邑五百戶賜紫金魚袋臣趙鼎

推忠協謀同德守正亮節佐理功高開府儀同三司行尚書左僕射兼門下侍郎同中書門  
下平章事集賢殿大學士在國魯國公食邑三千五百戶食實封參仟捌伯石臣曾公亮

推忠協謀同德守正亮節佐理功高開府儀同三司行尚書左僕射兼門下侍郎同中書門下平章事

館學士監脩國史兼譯經潤文使在國鄭國公食邑三千戶食實封肆仟貳佰石臣富弼

